

Ka Nupepa Kuokoa, Volume I, Number 4, 2 December 1861 — He mau keiki hakaka me ka mano. [ARTICLE]

He mau keiki hakaka me ka mano.

I ka Poakolu, oia ka la 20 o Nove-maba, i ka hora 12 o ke awakea, hele aku la kekahi mau keiki elua, i ka auau kai, o M. Kekiakona, a me K. Kalunakanalima, ma kahi heenalu o Uo, ma Lahaina, ia laua e auau ana, hoea mai la kekahi Mano nui, e 3 anana ka loa, a i ko laua ike ana i ua Mano nei, i aku la kekahi i kekahi, e pau kua i ka Mano; i mai la hoi kekahi, mai makau oe, hooponopono ia aku ko papa heenalu a kupo i ka waha o ka Mano, alaila, ku malie iho la kekahi keiki, me ka manao e lanakila ana kela ia nui weliweli, ke nana aku, maluna o laua nei, a i ka manawa i kokoke loa mai ai ua ia nei i ko laua nei wahi e ku ana, pane aku la kekahi o laua me ka haalulu, i aku la. "Pahu ia aku hoi ko papa ma ka mahamaha o ka Mano, pahu aku la no kela aku ma ka mahamaha, holo koke aku la no kekahi keiki a paa ma ka hui o ua Mano nei, o ka mea nana i hou aku, holo aku la no ia a paa aku la ma ke a luna o ka Mano, nanao aku la kekahi lima ma ka mahamaha, a umeume iho la lakou, a hiki ka ia ma kahi papau, pau kana wahi eha, lilo na laua nei ka eha i koe, pepehi iho la laua nei i ua Mano nei a make, kii aku la laua i kekahi poe e kii mai i ua Mano nei, kii ia mai la no ua Mano nei, lawe ia aku la mauka, Pipi holo kaa.

M. K. LIHAUWAIEKEEKEKALANI.

Lahaina Novemaba 10 1861.

